

■ Beberapa kawasan di Sabak Bernam tenggelam lepas hujan 3 jam

Oleh Mohd Shukor Amin
hmetroshahalam@hmetro.com.my
Sabak Bernam

Hujan berterusan selama kira-kira tiga jam pagi semalam menyebabkan Pekan Sabak Bernam dan beberapa kampung berhampiran, di sini, dilanda banjir kilat.

Antara kampung dinaiki air ialah Kampung Batu 38 Baroh, Bagan Nakhoda Omar, Banting, Teluk Rhu dan Sekendi selepas hujan sejak jam 8 pagi.

Penduduk menyifatkan banjir kilat yang melanda kampung terbabit adalah terburuk pernah berlaku dalam tempoh 40 tahun di daerah ini.

Penduduk Kampung Batu 38 Baroh, Shafie Komari, 54, berkata, dia yang akan menerima menantu Sabtu ini, terpaksa menangguhkan kerja pemasangan khemah semalam berikutan halaman rumahnya dinaiki air sedalam satu meter.

Menurutnya, segala persiapan dan kad undangan

"Saya berharap banjir akan pulih sebelum majlis perkahwinan anak"

Shafie Komari

perkahwinan anaknya, Nurul Syahidah, 25, sudah diedarkan kepada saudara mara, rakan dan jiran, namun bimbang jika air masih tidak surut dalam tempoh terdekat.

"Jumaat ini pun sudah ada yang akan datang membantu persiapan majlis, tapi saya risau kalau air depan rumah tidak surut. Saya harap semuanya akan pulih seperti sedia kala sebelum majlis berlangsung," katanya ketika

ditemui, semalam.

Seorang lagi penduduk Mohd Zamri Mohd Musri, 23, berkata, dia yang bersiap untuk ke tempat kerja kira-kira jam 8 pagi terkejut apabila mendapati rumahnya dimasuki air.

"Waktu itu saya sedang bersiap ke tempat kerja, tapi saya sebaik melangkah ke pintu saya nampak air melimpah dari halaman rumah dan lebih merisaukan air masuk ke dalam rumah," katanya.

Menurutnya, punca banjir dipercayai akibat saluran pa-

rit yang tidak dibersihkan sejak sekian lama.

Sementara itu, Imam Masjid At-Taqwa Batu 38, Mahfuz Abdul Karim, 73, berkata, Jabatan Pengairan dan Saliran (JPS) perlu menyelesaikan masalah itu segera bagi mengelak kejadian sama berulang.

"Sistem perparitan di sini memang tidak diurus dengan baik. Bagaimana penduduk ingin mengelakkan kejadian banjir kilat jika JPS tidak selenggara sistem perparitan," dakwanya.

Bah terburuk dalam 40 tahun

PEKAN Sabak Bernam ditenggelami air, semalam.



PENDUDUK Mohd Radzi (kiri) dan Mohd Jamaluddin menunjukkan rumah mereka yang dinaiki air.